

09 AUG 2002

Sukan-Basikal (ETOM)/I

PERALATAN 'PHOTO FINISH' CANGGIH UNTUK JELAJAH GAMUDA EAGLE

KUALA LUMPUR, 9 Ogos (Bernama) -- Jelajah Gamuda Eagle Malaysia yang pertama, yang dijadual diadakan di Langkawi pada 14 hingga 18 Ogos ini, akan menggunakan peralatan 'photo finish' dan sistem keputusan yang canggih bagi memastikan ketepatan dan keputusan yang pantas untuk perlumbaan itu.

Ini kali pertama peralatan itu, yang dibuat oleh Lynx System Developers di Boston, pengeluar dan pengedar barangan Data Sukan, digunakan dalam perlumbaan di Malaysia.

Pengarah eksekutif Clear Mission Sdn Bhd, Abdullah Kamal Shafi'i berkata sistem photo finish FinishLynx telah digunakan dengan meluas pada jelajah basikal utama dunia, termasuk tiga kejohanan jelajah utama -- Tour de France, Giro d'Italia dan Spanish Vuelta.

Peralatan canggih dan boleh dipercayai itu penting dalam kejohanan basikal utama dan perlumbaan berperingkat dan perlumbaan lain seperti mendayung dan lumba kuda, bagi memastikan keputusan yang tepat semasa pecutan beramai-ramai di garisan penamat.

Sistem itu membolehkan penggunaannya mendapatkan keputusan dengan cepat dan kemudian menyalurkannya ke dalam internet, ke papan keputusan dan remote databases.

"Adalah diharapkan dengan menggunakan peralatan canggih dan moden ini, kita mampu menaikkan taraf pertubuhan kita. Pada masa yang sama, ia akan membolehkan kita mempelajari teknologi baru yang akan berguna bagi pertubuhan kita pada masa akan akan datang," kata Kamal dalam satu kenyataan di sini, hari ini.

Pada Tour de Langkawi 2002, pihak penganjur memperkenalkan cacatan masa baru yang diletakkan kepada basikal pelumba bagi mendapatkan keputusan yang tepat dan pantas.

Sementara itu, Radio Televisyen Malaysia (RTM), hos penyiar bagi perlumbaan ini akan mengadakan siaran tertunda selama 30 minit perlumbaan ini pada 14 hingga 18 Ogos. Program ini akan menyiarkan kemuncak dan yang acara menarik mengenai perlumbaan, di TV1 pukul 11.30 malam.

Kamal berkata anggota pengiring perlumbaan ini mengandungi 600 orang, yang termasuk pelumba dan pasukan.

Sementara itu, pasukan dan pelumba akan mula tiba di Langkawi mulai esok.

Pasukan dan pelumba China, Mongolia, Ireland, Team Krone of Norway, Team Down Under akan tiba di sini esok sebelum diterbangkan ke Langkawi, Ahad ini.

Jepun, Korea, Filipina dan Vietnam juga akan tiba di Langkawi pada Ahad manakala Team Suisse and Austria, Giant Asia Racing dan Albania, Malaysia, Taiwan, Thailand, Iran, Indonesia, Team KL and Selangor hari Isnin.

Sejumlah 21 pasukan akan bertanding pada jelajah lima peringkat itu yang menawarkan hadiah wang tunai RM200,000 (US\$52,000). Perlumbaan ini dianjurkan oleh Clear Mission Sdn Bhd dan dibawah naungan Perdana Menteri Datuk Seri Dr Mahathir Mohamad.

-- BERNAMA

HRS ZS ZB